

四庫全書

史部

欽定四庫全書

史部

江西通志卷一百五十二

詳校官嚴察御史_臣范乘

檢討_臣德生覆勘

總校官_臣知縣楊懋珩

校對官_臣中書溫汝道

騰錄監生_臣席大賓

欽定四庫全書

江西通志卷一百五十二

藝文 詩六

五言律

唐

送豐城王少府

楊炯

愁結亂如麻
長天照落霞
離亭隱喬樹
溝水浸平沙
左尉才何屈
東關望漸賒
行看轉牛斗
持此報張華

題大庾嶺北驛

宋之問

陽月南飛雁傳聞至此回我行殊未已何日復歸來江
靜潮初落林昏瘴不開明朝望鄉處應見隴頭梅

度大庾嶺

度嶺方辭國停輶一望家魂隨南翥鳥淚盡北枝花山
雨初含霽江雲欲變霞但令歸有日不敢恨長沙

在洪州答綦母學士

張九齡

旬雨不愆期由來自若時爾無言郡政吾豈欲天欺常

念涓塵益惟歡草樹滋課成非所擬人望在東菑

湖口望廬山瀑布泉

萬丈洪泉落迢迢半紫氛奔飛下雜樹灑落出重雲日照虹蜺似天清風雨聞靈山多秀色空水共氤氲

自彭蠡湖初入江

江岫殊空闊雲煙處處浮上來羣噪鳥中去獨行舟牢落誰相顧逶迤日自愁更將心問影于役復何求

自豫章南還江上作

歸去南江水磷磷見底清轉逢空闊處聊洗滯留情浦
樹遙如待江鷗近若迎津途別有趣況乃濯吾纓

奉酬張洪州九齡江上見贈

孫翊

受命讞封疆逢君牧豫章於焉審虞芮復爾共舟航
別秋陰盡懷歸客思長江臯枉離贈持此慰他鄉

尋廬山崔徵君

邱為

日高雞犬靜門掩向寒塘夜竹深茅宇秋亭冷石牀
住山年已遠服藥壽偏長虛棄浮生者相逢益自傷

題遠公經臺

祖詠

蘭若無人到真僧出復稀苔侵行道席雲濕坐禪衣澗
鼠緣香案山蟬噪竹扉世間長不見寧止暫忘歸

九日龍沙作寄劉大旻虛

孟浩然

龍沙豫章北九日挂帆過風俗因時見湖山發興多客
中誰送酒權裏自成歌歌竟乘流去滔滔任夕波

送袁太祝尉豫章

何幸遇休明觀光來上京相逢武陵客獨送豫章行隨

牒牽黃綬離羣會墨卿江南佳麗地山水舊難名

夜泊廬江聞故人在東林寺以詩寄之

江路經廬阜松門入虎溪聞君尋寂樂清夜宿招提石
鏡山精怯禪牀怖鵲樓一燈如悟道為照客心迷

晚泊尋陽望廬山

挂席幾千里名山都未逢泊舟尋陽郭始見香爐峯嘗
讀遠公傳永懷塵外蹤東林精舍近日暮但聞鐘

酬秦徵君徐少府春日見寄

集作奉酬秦徵君系
春日撫州西亭野望

兼寄徐

少府

韋應物

終日愧無政與君聊散襟城根山半腹亭影水中心
朗詠竹牕靜野情花逕深那能有餘興不作剡溪尋

寄洪州幕府盧二十一侍御

自南昌令拜
項同官洛陽

忽報南昌令乘驄入郡城同時趨府客此日望塵迎
文苑臺中妙冰壺幕下清洛陽相去遠猶使故林榮

送裴郎中貶吉州

劉長卿

亂軍交白刃一騎出黃塵漢節同歸闕江帆共逐臣
援

愁岐路晚梅作異方春知已
鄼侯在應憐脫粟人

餘干旅舍

搖落暮天迴青楓霜葉稀
孤城向水閉獨鳥背人飛
渡口月初上鄰家漁未歸
鄉心正欲絕何處擣寒衣

餘干夜宴奉餞前蘇州韋使君新除婺州作

復拜東陽郡遙馳北闕心
行春五馬急向夜一猿深山
過康郎近星看婺女臨幸
容棲託分猶戀舊棠陰

晚次苦竹館却憶干越舊遊

匹馬風塵色千峯旦暮時遙看落日盡獨向遠山遲故
驛花臨道荒村竹映籬誰憐却迴首步步戀南枝

送李二十四移家至江州

煙塵猶滿目岐路易霑衣逋客多南渡征鴻自北飛九
江春草綠千里暮潮歸別後難相訪全家隱釣磯

奉送盧員外之饒州

天書萬里至旌旆上江飛日向鄱陽近雲看吳岫微暮
帆何處落潮水背人歸風土無勞問南枝黃葉稀

送舍弟之鄱陽居

鄱陽寄家處一別掩柴扉故里何人在
滄波孤客稀湖山春草遍雲木夕陽微
南去逢迴雁應憐相背飛

送梁郎中赴吉州

遙想廬陵郡還聽叔度歌舊官移上象
新令布中和看竹經霜少聞猿帶雨多
但愁徵拜日無奈借留何

送李侍御貶鄱陽

迴車仍昨日謫去已秋風干越知何處
雲山只向東暮

天江色裏田鶴稻花中却見鄱陽吏猶應舊馬驄

送青苗鄭判官歸江西

三苗餘古地五稼滿秋田來問周公稅歸輸漢俸錢江城寒背日湓水暮連天南楚凋殘後疲民賴爾憐

歸弋陽山居留別盧邵二侍御

渺渺歸何處沿流附客船久依鄱水住頻稅越人田偶俗機偏少安閒性所便祇應君少慣又欲寄林泉

送盧員外往饒州

李嘉祐

為郎復典郡錦帳映朱輪
露冕隨龍節停橈得水人
早霜蘆葉變寒雨石榴新
莫怪諳風土三年作逐臣

送張觀歸袁州

羨爾湘東去煙花尚可親
綠芳深映馬遠岫遞迎人
饑狄啼初日殘鶯惜暮春
遙憐謝客興佳句又應新

送蘓修往上饒

愛爾無羈束雲山恣意過
一身隨遠岫孤權任輕波
世事關心少漁家寄宿多
蘆花泊舟處江月奈人何

送王牧往吉州謁王使君叔

細草綠汀洲
王孫耐薄遊
年華初冠帶
文體舊弓裘
野渡花爭發
春塘水亂流
使君憐小阮
應念倚門愁

送袁員外宣慰勸農畢赴洪州使院

聖主臨前殿
殷憂遣使臣
氣迎天詔喜
恩發土膏春
草色催歸櫂
鶯聲為送人
龍沙多道里
流水自相親

登湓城浦望廬山初晴值省勅催赴江陰

西望香爐雪
千峯晚色新
白頭悲作吏
黃紙苦催人
多

負登山屐深藏漉酒巾傷心公府內手板日相親

送彈琴李長史往洪州

錢起

抱琴為傲吏孤棹復南行幾度秋江水皆添白雪聲佳
期來客夢幽思緩王程佐牧無勞問心和政自平

送趙評事赴洪州使幕

韓翃

孤舟行遠近一路過湘東官屬張廷尉身隨杜幼公山
河映湘竹水驛帶青楓萬里思君處秋江夜雨中

送洪州李別駕之任

郎士元

南去秋江遠孤舟興自多能將流水引更入洞庭波夏
口帆初上潯陽雁正過知音在霄漢佐郡宣蹉跎

石頭館酬王將軍

誰為繡衣客肯駐木蘭舟連雁沙邊至孤城江上秋歸
帆背南浦楚塞入西樓何處看離思滄波日夜流

送李使君赴撫州

皇甫冉

遠送臨川守還同康樂侯歲時徒改易今古接風流五
馬嘶長道雙旌向本州鄉心寄西北應上郡城樓

玉山嶺上作

皇甫曾

悠悠驅匹馬，征路上連岡。
晚翠深雲竇，寒臺淨石梁。
荻花偏似雪，楓葉不禁霜。
愁見前程遠，空郊下夕陽。

鄱陽大雲寺一公房

顧況

盡日陪游處，斜暉竹院清。
定中觀有漏，言下證無生。
色界聊傳法，空門不用情。
欲知相去近，鐘鼓兩聞聲。

春日洪州即事

耿漳

鍾陵春日好，春水滿南塘。
竹宇分朱閣，桐花間綠楊。
蹉

跼看鬢色留滯惜年芳欲問蜀愁發秦關道路長

早秋江行

竇 鞏

迴望湓城遠西風吹荻花暮潮江勢闊秋雨雁行斜多
醉渾無夢頻愁欲到家漸驚雲樹轉數點是晨鷄

奉陪李大夫九日宴龍沙

戴叔倫

邦君採菊地近接旅人居一命招衰疾清光照里閭去
官慙比謝下榻貴同徐莫怪沙邊倒偏需杯酌餘

奉陪李大夫九日龍沙宴會

權德輿

龍沙重九會千騎駐旌旗水木秋光淨絲桐雅奏遲煙
蕪斂暝色霜菊發寒枝今日從公醉全勝落帽時

送孔江州

九派潯陽郡分明似畫圖秋光連瀑布晴翠辨香鑪才
子厭蘭省邦君榮竹符江城多暇日能寄八行無

江上送客遊廬山

張繼

楚客自相送霑裳春水邊晚來風信好併發上江船花
映新林岸雲開瀑布泉愜心應在此佳句向誰傳

送撫州周使君

即侍中
之婿

盧綸

周郎三十餘天子賜魚書龍節隨雲水金鏡動里閭松
聲三楚遠鄉思百花初若轉弘農守蕭咸事不如

送從叔赴洪州

李端

榮家兼佐幕叔父似還鄉王粲名雖重郝超髯未長鳴
橈過夏口斂笏見潯陽後夜相思處中庭月一方

奉送杜中丞赴洪州

暢當

詔出鳳凰宮新恩連帥雄江湖經戰陣草木待仁風豪

右貪威愛紆繁德簡通多慙君子顧攀餞路塵中

鍾陵雪夜訪友人

楊凌

窮臘催年急陽春怯和歌殘燈閃壁盡夜雪透牕多歸路山川險遊人夢寐過龍洲不可泊歲晚足驚波

送頭陀上人赴廬山寺

鄭常

僧家無住著早晚出東林得道非真相頭陀是苦心持齋山果熟倚錫野雲深溪寺誰相待香花與梵音

次石頭驛寄江西王中丞

韓愈

憑高迴馬首一望豫章城人由戀德泣馬亦別羣鳴寒
日夕初照風江遠漸平默然都不語應識此時情

送殷華之洪州

陳羽

離堂悲楚調君奏豫章行愁處雪花白夢中江水清扣
船歌月色避浪宿猿聲還作經年別相思湖草生

潯陽宴別

白居易

鞍馬軍城外笙歌祖帳間乘潮發湓口帶雪別廬山暮
景牽行色春寒散醉顏共嗟炎瘴地盡室得生還

晚題東林寺雙池

向晚雙池好，初晴百物新。
裊枝翻翠羽，濺水躍紅鱗。
萍汎同遊子，蓮開當麗人。
臨流一惆悵，還憶曲江春。

送沈亞之尉南康

殷堯藩

行邁南康路，客心離怨多。
暮煙葵葉屋，秋月竹枝歌。
孤鶴唳殘夢，驚猿嘯薜蘿。
對江翹首望，愁淚疊如波。

和厲元侍御題戶部李相公廬山艸堂

姚合

茅屋臨江起登庸復應期遙知歸去日自致太平時幽
藥禪僧護高宿宿鳥窺行人盡歌詠唯子獨能詩

送沈下賢謫尉南康

張祐

秋風江上草先是客心摧萬里故人去一行新雁來山
高雲緒斷浦迴月波顏莫怪南康遠相思不可裁

旅次上饒溪

碧溪行幾折凝櫂宿汀沙角斷孤城掩樓深片月斜夜
橋昏水氣秋竹靜霜華更想曾題壁凋零可歎嗟

題上饒亭

溪亭拂一琴促軫坐披衿夜月水南寺秋風城外砧早
霜紅葉靜新雨碧潭深唯是壺中物憂來且自斟

江西道中

二首

西江江上月遠遠照征衣夜色草中網秋聲林外機渚
田牛路熟石岸客船稀無復是鄉井鷓鴣聊自飛
秋灘一望平遠遠見山城落日啼烏柏空林露寄生燒
畬殘火色盪漿夜溪聲況是曾遊處桑田小變更

罷鍾陵幕吏十三年來泊湓浦感舊為詩

杜牧

青梅雨中熟檣倚酒旗邊故國殘春夢孤舟一褐眠
搖遠堤柳暗暗十程烟南走鍾陵道無因似昔年

春泊弋陽

許渾

江行春欲半孤枕弋陽堤雲暗猶飄雪潮寒未應溪飲
猿聞棹散飛鳥背船低此路成幽絕家山鞏洛西

送友人歸宜春

紀唐夫

落花兼柳絮無處不紛紛遠道空歸去流鶯獨自聞
野橋喧碓水山郭入樓雲故里南陵曲秋期欲送君

彭蠡湖春望

項斯

湖亭東極望遠櫂不須迴
遍草新湖落連天衆雁來
蘆洲殘照盡雲障積煙開
更想鷓鴣夸子扁舟安在哉

桑落洲

李羣玉

九江寒露夕微浪北風生
浦嶼漁人火蒹葭鳬雁聲
蘋雲晦廬嶽微鼓辨湓城
遠憶天邊弟曾從此路行

酬鄭進士九江新居見寄

李咸用

躡屐叩柴關，因成盡日閑。
獨聽黃鳥語，深似白雲間。
萍沼寬於井，莎城綠當山。
前期招我作，此景得吟還。

送韓揆之江西

李冶

相看指楊柳，別恨轉依依。
萬里江西水，孤舟何處歸。
湓城潮不到，夏口信應稀。
唯有衡陽雁，年年來去飛。

鍾陵野步

曹松

岡扉聊自啓，信步出波邊。
野火風吹闊，春冰鶴啄渚。

檣齊驛樹山鳥入公田未創孤雲勢空思白閣年

贈餘干袁明府

一雨西城色陶家心自清山銜中郭影雲卷下湖程公

署聞流水人烟入廢城難忘楚盡處新有越吟生

過陶徵君隱居

崔塗

陶令昔居此弄琴遺世榮田園三畝綠軒冕一銖輕衰
柳自無主白雲猶可耕不隨陵谷變應只是高名

懷廬嶽書齋

杜荀鶴

長憶在廬嶽免低塵土顏煮茶牕底水採藥屋頭山是
境皆遊遍誰人不羨閑無何一名繫引出白雲間

贈廬嶽隱者

自見來如此未嘗離洞門結茅遮雨雪採藥給晨昏古
樹藤纏殺春泉鹿過渾悠悠無一事不似屬乾坤

秋宿棲賢寺懷友人

一宿三秋寺閑忙與曉分細泉山半落孤客夜深聞鶴
去巢盛月龍潛穴擁雲苦吟方見景多恨不同君

建昌渡暝吟

韋莊

月照臨官渡鄉情獨浩然
鳥棲彭蠡樹月上建昌船
市散漁翁醉樓深賈客眠
隔江何處笛吹斷綠楊烟

廬山

王貞白

嶽立鎮南楚雄名天下聞
五峯高閼日九疊翠連雲
夏谷雪猶在陰巖晝不分
唯應嵩與華清峻得為羣

遊東林寺

黃滔

平生愛山水下馬虎溪時
已到終嫌晚重遊預作期
寺

寒三伏雨松偃六朝枝翻譯如曾見白蓮開滿池

桑落洲

胡玠

莫問桑田事但看桑落洲數家新住處昔日大江流古
岸崩欲盡平沙長未休想應百年後人世更悠悠

南唐

送王郎中之官吉水

李建勳

南望廬陵郡山連五嶺長吾君憐遠俗從事輒名郎移
戶多無土春蠶不滿筐惟應勞贊畫溪峒況彊梁

寄廬山白上人

左偃

潦倒門前客，閒眠歲又殘。
連天數峯雪，終日與誰看。
萬丈高松古，千尋落水寒。
仍聞有新作，懶寄入長安。

魏夫人壇

李中

仙壇遺跡在苔合，落花名絳節何年返。
白雲終日生旋，新芳草色依舊偃。
松聲欲問希，夸事音塵隔上清。

吉水作尉酬高援秀才見贈

佐邑慙無術，敢言貧與清。
風騷誰是主，烟月自關情。
卷

箔當山色開窗就竹聲
憐君惠嘉句資我欲垂名

過武寧縣

王周

行過武寧縣初晴物景和
岸回驚水急山淺見天多
細草濃藍潑輕烟足練拖
晚來何處宿一笛起漁歌

送王員外宰德安

徐鉉

家世朱門貴官資粉署優
今為百里長應好五峯游
柳影連彭澤湖光接庾樓
承明須再入官滿莫淹留

送姚宰任吉州安福縣

釋無可

落絮滿衣裳攜琴問酒鄉挂帆南入楚到縣半浮湘吏
散翠禽下庭間斑竹長人安宜遠泛沙上蕙蘭香

遊廬山寺

千峯路盤盡林寺昔何名步步入山影房房聞水聲多
年人跡斷殘照石陰清自可求居止安閑過此生

夜宿西林寺寄賈島

暗蟲喧暮色默思坐西林聽雨寒更盡閉門落葉深昔
因京邑病併起洞庭心亦是吾兄弟遲回共至今

題鄭谷江畔桐齋

釋

皎然

客齋開別住坐占綠江濱流水非外物閒雲長屬君浮
榮未可累曠達若為羣風起高梧下清絃日日聞

登大林寺觀白太傅題版

釋

齊已

九疊蒼崖裏禪家鑿翠開清時誰夢到白傳獨尋來怪
石和僧定閒雲共鶴迴任茲休去者心是不然灰

過西山施肩吾舊居

大志終難起西峯臥翠堆牀前倒秋壑枕上過春雷鶴

見丹成去僧聞栗熟來荒齋松竹老鸞鶴自徘徊

過陳陶處士舊居

一室貯琴尊詩皆大雅言夜過秋竹寺醉打老僧門遠
燒來籬下寒蔬簇石根閒庭除鶴跡半是杖頭痕

尋陽道中作

東林

秋聲來嶽樹草色徧汀洲多事時為客無人處上樓雲
疎片雨歇野闊九江流欲向南朝去詩僧有惠休

東林雨後望香爐峯

翠溼僧牕裏寒堆鳥道邊靜思尋去路急遠落來泉暮
雨開青壁朝陽照紫烟二林多長老誰憶上頭禪

寄彭澤晝公

聞君彭澤住結構近陶公種菊心相似嘗茶味不同湖
光秋枕上嶽翠夏窗中八月東林去吟香菡萏風

東林寺

釋
修睦

欲去不忍去徘徊吟繞廊水光秋澹蕩僧好語尋常碑
古苔文疊山晴鐘韻長翻思南嶽上欠此白蓮香

宋

彭澤狄梁公祠

趙抃

賢正屯蒙日陰邪會用時人從萬死過誰肯一言危毒
意回天后忠誠薦東之復唐三載留得枕江祠

江上白樂天祠

我愛白司馬有言來謁祠才名千古照忠義一生奇諫
切寧思祿讒行卻罪詩如何江上客唯道琵琶詞

經鄱陽湖

捨陸事川程霜天曉色明長波萬頃闊大舸一帆輕靜
唱村漁樂斜飛渚鴈驚雲披見樓閣隱隱豫章城

登章貢臺

章貢東西派并流作贛川奔湍出城曲離合向臺前把
酒來憑檻鳴聲見放船滔滔歸底處滄海路三千

碧雲軒

范仲淹

我愛此中好幽軒絕世紛澂宵半窗月淡曉數峯雲遠
意經年就微吟並舍聞只應虛靜處所得自蘭芬

大林峯

周惇頤

三月山房暖林花互照明路盤層頂上人在半空行水色雲含白禽聲谷應清天風拂襟袂縹緲覺身輕

吏隱宜春郡詩十首

存三

祖無擇

吏隱宜春郡年豐獄訟稀餘糧委南畝茂草滿園扉天意憐艱食民心恥畫衣萬家行樂處車馬有光輝

吏隱宜春郡溪山若畫圖纖鱗時自躍幽鳥靜相呼曉浪噴寒雨晴嵐鎖綠蕪魚樵本吾事搔首重踟躕

吏隱宜春郡追惟二相賢

房琯李德裕

節明天寶日業茂會

昌年友善曾何累朋誣亦自煎

琯坐與李適之章堅等善貶宜春太守德裕為

王播李漢等所誣貶宜春長史

不才非不幸異代若差肩

羌先生廟

先生高世迹舊隱白雲深結宇知何代遺祠直至今地
分壇杏影門接社蓮陰我亦希風者終朝託玉岑

寄饒州范待制

梅堯臣

山水番君國文章漢侍臣古來中酒地今見獨醒人坐

嘯安浮俗談詩接上賓何由趨盛府徒爾望清塵

送洪州通判何太博若谷先歸新淦

拜官江上客乘馬不乘船獨畏蛟龍浪將歸風雨天
葛花侵野徑源水入腴田君住巴邱下西山道路連

送臨江軍監酒李太博

三江卑濕地北客宦遊稀霧氣多成雨雲蒸易損衣
白醪燒甕美黃雀下田肥未辨殊方語山歌半是非

吳季野話撫州潛心閣

高閣潛心所圖書曝蠹收青山隨宅轉遠水向門流迤
邐看無厭潺湲聽不休一聞秦洞說便欲泛漁舟

龜峯精舍

李 覲

去縣二十里路平時正春四山唯有石一寺更無塵融
結疑天意經營憶古人但知安樂處何必是全身

送葛源之太和主簿

穆 修

勿歎從卑位聊欣適去情秋風九月急飛鳥一帆輕鱸
斫江鱗活杯嘗楚釀清繁華莫回首寵辱正堪驚

南康望湖亭

蘇軾

八月渡長湖，蕭條萬象疏。
秋風片帆急，暮靄一山孤。
許國心猶在，康時術已虛。
岷峨家萬里，投老得歸無。

開先寺觀龍潭

米芾

渡峽捫青玉，臨深坐綠苔。
水從雙劍下山挾，兩龍來春
暖。花驚雪林空，石迸雷塵纓。
聊此濯却去，回首重回

贈景福順長老二首

并序

蘇轍

轍幼侍先君，聞嘗遊廬山，過圓通，見訥禪師，留連久。

之元豐五年以謫居高安景福順公不遠百里惠然
來訪自言昔從訥於圓通逮與先君遊歲月遷謝今
三十六年矣二公皆吾里人訥之化去已十一年而
順公年七十四神完氣定聰明了達對之悵懷疇昔
作二篇贈之

屈指江西老多年劍外人身心已無著鄉黨漫相親竄
逐知何取周旋意甚真仍將大雷雨一洗百生塵

念昔先君子南遊四十年相看順老在想見訥師賢歲

歷風輪轉禪心海月圓常情計延促無語對潛然

射蛟浦

萬騎巡遊遍千帆破浪輕射蛟江水赤教戰越人驚山
轉樓船影岸催連弩聲祈招無為賦酣寢盡平生

庾樓

元規情不薄上客有殷生夜半酒將罷公來坐不驚舞
翻江月迴談落塵毛輕塵世風流盡高樓空此名

至樟樹店寄徐安道

孔武仲

逼仄東南路連天紫翠峯微雲還掩日小雨正催農谷
鳥投枝急山花落澗濃意巖今不遠談笑喜相逢

贈仰山簡老

黃庭堅

簡師飛錫地天外集雲峯擎石松根瘦欹窗竹影濃山
寒侵衲澗響雜疎鐘客問西來意無言凭短筇

己酉歲十一月二十六日避寇至龍潭院十二月

十五日作五首

存三

洪 炎

徑轉橋橫水林深寺據山鐘魚告闌寂松竹媚孱顏避

地欣有託依僧成暫閑東歸路不隔片片隴雲還

突兀山椒寺披榛二百年刹從吾祖卜席是里僧傳溪
送無窮水林供不斷烟囊中有餘粒假息且安眠

潭黑蛟龍宅山青虎豹林隱憂何日了淹泊見冬深薄
雪恨還積疎梅冷不禁平生一樽酒衰疾廢孤斟

曉發驚湖

萬松杉嶺路千畝勸春耕不復紅鷺下空餘碧澗橫佛
高穿縹緲仙馭鏤崢嶸道釋分殊境籃輿許我行

信州逢寒食

客行寒食路春晚上饒城野寺烏烏樂山蹊荊棘生人
隨乘鴈集地隔一牛鳴俛首征途內官曹何日清

過揚瀾

彭汝礪

路入揚瀾險心魂獨惘然秋風浪飛屋春雨水彌天一
葉漁翁艇千鈞客子船相爭蝸角利平地看深淵

同遊獨山

相期一尊樂共宿獨山青塵土不能汙夢魂還自醒夕

陽登絕逕明月步危亭為我題僧壁炎天此日經

題袁州紫翠軒

黯淡襟橫野迢遙面古城丹青難盡意紫翠漫為名山
石開新雨溪楓照晚晴杖藜饒縱目談笑不無情

雲蓋寺詩

并序

唐淨圓禪師初自石霜來得乳蘿洞喜之將宅焉初
至蛇虺塞路矯然怒視師師以法語告蛇引去既宿
而斃師為焚之且視無遺燼有三水出焉左者黑右

者清中者白師既築室從之者歸市速今遂為名利
舊日蛇蛻穴今時蒼苔林寒泉三井舊高閣五峯深翠
竹娟娟老長松漠漠陰鳳凰池好在誰得老師心

題廬阜官廳壁

張耒

平生山水興今夜宿東林落日樓殿影西風鐘梵音雲
橫杉閣迴雨過虎溪深脚力猶堪在它年當重尋

過新城院

張商英

昔讀旴川集嘗聞泰伯賢新城文刻在往事野僧傳氣

格終驚俗光芒合貫天田翁不知價只得十千錢

萍鄉即事

蔣之奇

地接長沙近鄉名自古聞毛山千嶂雪玉女一墩雲拱
木扶霄上飛泉觸石分霜風萍實老目斷楚江濱

滕王閣詩二首

徐俯

一日追王造千年與客遊雲邊梅嶺出坐下贛江流日
落迴飛鳥烟深失釣舟蟬聲枯柳外天地晚風秋
雲氣浮高棟波瀾遠古城雨餘山更碧葉下水逾清燕

語留秋色鴉聲落晚晴故王歌舞地帆急見山行

登郡學稽古閣晚望

蔡 棟

簷外川原迴烟中草樹微山城暮吹角客子淚沾衣歲
月經身老行藏與願違歸禽帶落日渺渺背人飛

化戍巖

李若水

翠石黏雲濕寒巖帶蘚深樹涵懷古意水印讀書心經
濟神猶在幽棲徑可尋青氈吾舊物稅駕臥山陰

中秋宿瀼溪驛

王十朋

半月游廬阜中秋宿瀼溪祠尋元子隱

元次山舊隱

樹認赤

鳥栖坐待雲開月行愁雨作泥番人應話我身在九江

西

南遷題吉州剛應侯廟柱

陳剛中

疏爵新剛應論功舊石材能形文母夢還訝佞人來海
市為誰出衡雲豈自開乞靈如見告逐客幾時回

按隆祐太后避金兵舟泊吉州石材廟下夜夢神告
曰速行敵至太后驚寤即發舟指贛金人追至造口

不及而還事定封廟神為剛應侯時剛中以胡忠簡
事牽連被謫安遠故詩中云云後竟死貶所

臨川道上

楊時

風雨離山驛斷橋危欲顛去心奔逸驥行路上青天鴈
序江湖樂寒歸島嶼連悠悠遠征客千里獨茫然

鳳停館中秋

王廷珪

山高月未吐吟上嶺頭看萬里雲霄靜一天星斗寒蝦
蟆出金背玉兔動銀盤唯有南飛鵲遠枝終不安

廬山道中寄送聶名世

村遠孤煙起山明曉霧開
人行萬松裏路過九江來
此去日千里其如腸九回
淮南酒樓近玉笛不勝哀

陪陳帥登孺子亭

王阮

未上滕王閣先登孺子亭
朝廷黨錮傳湖海少微星
獨善非忘世高風自有靈
東湖山上色長為此人青

閏月十一日月中坐彭蠡門
喚船與諸人共載汎湖至隄
首回樵入西灣還分韻賦詩
約來晚復集

詩不至者浮以大白

朱熹

解組無多日歸哉喜欲狂
臨風成邂逅載月下滄浪
酌酒傳清影鳴橈繫素光
佗年隔千里此夜莫相忘

和張彥輔白鹿洞作

邃谷新華館風煙再吐吞
舊眠聞野鹿遺恨響驚猿
共賞忻同趣分攜愴別魂
徘徊空日夕無策駐行軒

次彥輔西原作

無處堪投跡空山寄一椽
懸門窺絕壁繚徑上層巔
檻

閑吞江浪窗虛響谷泉丹經閑自讀不為學神仙

次彥輔臥龍作

瀑水源何處高疑雲漢通瀉時垂練直落處古潭空
寄詩能好龍蟠意自雄知君來峴首為我說隆中

次彥輔棲賢作

融冶何年事停杯莫問天祇今從痼疾疇昔似因緣
傾耳真三峽投文入九淵蘭亭那得此猶足致羣賢

十一月二十六日宿萍鄉西三十餘里黃花渡口

客舍稍明潔有宋亨伯題詩亦頗不俗因錄而和之

鼎足爐邊坐陶然共一樽道心元自勝世味不須論安穩三更睡清明一氣存雖無康樂句聊爾慰營魂

九日奉陪高州史君莆陽別駕會稽丞公善化明府仲衡詩伯并屈子美元範二兄及郡中諸文武同登紫霄絕頂南望江湖北眺淮甸少快心目既歸又得仲衡佳篇句法清麗情致悽惋三復不勝

起予之嘆謹次韻呈請皆賦之以紀一時之盛

此日登高處千年錦樹稠無人嘲落帽有客賦悲秋忽
忽塵中老忽忽物外遊江湖空極目不盡古今愁

安仁曉行

夙駕安仁道行行得自娛荒山圍野闊遠樹出林孤景
晦長烟合天寒碧草枯歸心懷往路極目向平蕪

章巖

豁爾天開宇呀然夜不扃閑雲任棲宿密雨斷飄零破

屋僧常住高軒客屢經古今題寫處一半蘚文青

南安道中

曉澗淙流急秋山寒氣深高蟬多遠韻茂樹有餘陰煙
火居民少荒溪草露侵悠悠秋稼晚寥落歲寒心

清江道中見梅

今日清江路寒梅第一枝不愁風嫋嫋正奈雪垂垂煖
熱惟須酒平章却要詩他年千里夢誰與寄相思

進賢道中

往辭湘水曲今過豫章城改歲無多日到家才幾程晝
憐春意迫夜喜月華清此去無淹軌前途似掌平

過豐城作

渺渺豐城縣回頭憶舊遊晴江羅遠樹宿莽亂中洲寶
劍今鱗甲神光尚斗牛他年還記得此夜一扁舟

過皂口

楊萬里

贛石三百里春流十八灘路從青壁絕船到半江寒不
是春光好誰供客子看猶須一尊渌并遣百憂寬

寄題南昌尉廳思賢亭

并序

南昌尉廳之右有孺子墓墓前故有思賢亭中更兵燹亭毀墓湮今尉劍津張敬之因葺公廨披榛得墓按圖牒墓旁有九里井求之得井又有毗耕桓伊墓下得甃三款識云晉平南將軍墓距聘君墓七里驗其遐邇而信表其基乃復其亭云敬為賦之

有客栖霞外無名浣黨中南州一高士東海獨清風舊國有禾女荒阡猶石翁更煩吹笛魄端為洗榛叢

豫章南浦亭泊舟

二首

范成大

繡檻臨滄渚，牙樯插暮沙。
浦雲沈斷鴈，江雨入昏鴉。
野曠天何近，春寒歲未華。
來朝風一席，隨處且浮家。
閨歲花光晚，霜朝草色荒。
趁墟猶市井，收潦再耕桑。
客路東西懶，江流日夜忙。
長歌情不盡，一酌酹滄浪。

宿華嚴寺

陸游

夜宿華嚴寺，人扶到上方。
喚僧同看畫，避佛旋移牀。
小雨不成雪，烈風還作霜。
鐘殘燈漸暗，趺坐默焚香。

登擬峴臺

顓頊思吳客淒涼擬峴臺一年秋欲到兩鬢老先催
裊裊菱歌斷翩翩水鳥來倚闌哦五字未穩莫輕回

撫州上元

江月微雲外街泥小雨餘人如虛市散燈似曉星疎
羈鴈同身世新霜上鬢鬚明年更清絕漁火對茅廬

發臨川

見客道旁店添衣江上村陂長風浩浩山遠霧昏昏
虛

日人聲合凶年菜色繁扶衰歸北闕何以報君恩

別張教授歸獨登擬峴

小閣敞朱扉停車暫息機行人呼晚渡幼婦浣秋衣霜
樹敲危堞風鴉滿落暉登臨客愁裏況是送將歸

金石山

開歲為休暇官司亦暫閑樓臺先晝永花柳尚春慳鳴
鳥隨遊轡和風愜醉顏更憐歸路好破墨數峯山

湖口宰任伯厚挹清亭

劉過

政笑行役倦登臨
心眼開舒蘄千里見
蜀巔兩江來老
覺樹如此涼生風快哉
主人方好客不算酒行杯

登四望亭

王炎

春老飛花罷園林
遍綠陰憑高聊寓目
念遠更傷心劇
郡才難稱衰年病
易侵不如休歇去
吾意決投簪

溪上晚步

二首分寧作

山靜色不改溪深流自遲
緩行聊寓目小立卻支頤
樵斧寒尤響漁舟晚更移
老夫無伴侶稚子獨追隨

風定留黃葉波深湧白沙前山惟道院斷岸半漁家老
去忘時事閒中度歲華經旬如再出便可探梅花

宿正覺寺

曾季狸

正覺江邊寺風煙罨畫然庭羅合抱柏門泊釣魚船暮
雨涼初過中秋月正圓無人來共賞獨自占江天

遊華子岡紅泉碧澗

曾極

去城纔半驛深谷自逶迤藤絡崩崖石松垂倒地枝寒
山縮毛髮碧澗照鬚眉霜氣全消歇空存太傅祠

龍回院

謝諤

堂殿塵埃外軒櫺紫翠中
凭欄千障雨敲枕半窗風
得意何妨僻尋幽豈易窮
分張間草木一一見春工

遊越山即景

山在奉新縣北四十里

幸元龍

上得越山半方壺紫翠環
山幽春溜響花落午陰閑
梵刹依松外仙家在竹間
小窗借高枕風定鳥綿蠻

興福寺

真德秀

為厭市喧雜攜詩來此吟
鳥聲山路靜花影寺門深
樓

閣莊嚴地池塘清淨心松風亦好事送客出前林

遊青原

二首

文天祥

鐘魚間日月竹樹老風煙一徑溪聲滿四山天影圓無
言都是趣有想便成緣夢破啼猿雨開元六百年
空庭橫蟬蛸斷碣偃龍蛇活火參禪筍真泉透佛茶晚
鐘何處雨春水滿城花夜影燈前客江西七祖家

文山即事

宇宙風煙闊山林日月長開灘通燕尾伐石割羊腸盤

谷堪居李廬山偶姓康知名總閒事一醉擢滄浪

將母赴贛道西昌

重來鷗閣曉帆影漲新晴倚檻雲來去開簾花送迎江
湖春汗漫歲月老崢嶸手把忘憂草夔夔繞太清

快閣遇雨觀瀾

一笑登臨晚江流接太虛自慚雲出岫爭訝雨隨車慷
慨十圍柳周回千里魚故園隄好在夜夢繞吾廬

題鬱孤臺

城郭春聲闊樓臺晝影遲並天浮雪界蓋海出雲旗風
雨十年夢江湖萬里思倚闌時北顧空翠濕朝曦

翠玉樓觀雪

矯矯臨清泚濛濛認翠微
綈春生客袖鐵冷上戎衣
柳眼驚何老梅花覺半肥
新來有公事白戰破重圍

阜蓋樓

一水樓臺繞半空
圖畫開蝸涎行薜荔
雀影上莓苔碧
落人千載青山酒一杯
晚煙看不盡待月却歸來

石樓

曉色重簾捲春聲疊鼓催長垣連草樹遠水照樓臺八
境煙濃淡六街人往來平安消息好看看到嶺頭梅

湖口

江湖一都會宇宙幾興亡走馬蘆林外買魚茅舍傍南
人撐快槳北客坐危檣江水交岷水東流日夜長

南安軍

梅花南北路風雨濕征衣出嶺誰同出歸鄉如不歸山

河千古在城郭一時非饑死真吾志夢中行採薇

望彭蠡

嚴粲

萬壑氣交會今知楚澤雄水明繞辨樹霧合忽迷空遠
浦沈初月孤舟亂去鴻闌干已愁思漁唱入蘋風

南豐道中

四首

黃文雷

此縣聞天下披圖且萬家螭頭餘佛屋鹿角卧江沙好
與蘇凋瘵誰令息嘆嗟春風多少意殘竹映松花
此路通南國於今人少行遺民依廟住曠野用鋤耕古

木刀痕熟空山鬼火驚猶聞宿師處倉猝又招兵

想見承平日茲為富庶鄉門庭存位置井臼隔垣牆草
市宜區種空村又夕陽誰歟真致此盜賊已天亡

大村三百輩同此就天誅銳欲取禾耳那知暴骨乎雲
疑鶯鷺陣風想虎狼都掩骼行春令毋令長媚狐

上天池寺

始從平地望宛在九霄中不意身能到平生心併空江
淮通好雨日月會剛風三伏涼如水蟠拏想白龍

都昌書事

趙崇鉶

世事可無酒春藤還有花
山雲欲到地街鼓又催衙
風緊魚休市官貧飯帶沙
天機不得問暮色欲棲鴉

滕閣懷古

鄒登龍

凭高獨展眺風葉亂鳴秋
鸞舞自空閣漁歌尚晚舟
卷簾山歷歷倚檻水悠悠
月出江城暮淒涼萬古愁

遊玉笥山

玉笥凌空後元都詔吏仙
荒壇深覆草峭壁響流泉
石

洞隨龍蟄金丹許鶴傳夜深擣藥鳥啼破翠微煙

上慧力寺

今代空王宅前朝處士家牛車為象藏鹿苑發龍華松
密風生樹江空月在沙閣黎飯鐘後邀我試新茶

遊仰山寺

施地開金刹神因結佛緣怪松盤獺徑古木護龍淵雲
裏春山亂禽啼夜月圓路遙歸不得好借上方眠

登玉笥山投龍洞

羅與之

捫蘿入幽谷眼界益崢嶸石壁斷人跡泉流間鳥鳴日
高雲未散秋晚草猶榮坐久無歸意悠然世念輕

送宋謙父之清江因簡希亮

張至龍

吟詩夕陽裏相送上瀟灘前路逢梅處同誰倚權看歲
窮風力緊江闊鴈聲寒持此呈蘇季人生識面難

招賢渡溪閣晚望

趙汝錄

溪流清到底十頃浸秋光煙重山加色風狂鴈失行塵
埃雙老鬢天地幾斜陽何處一聲笛征人暗斷腸

臨川縣治古桂兩大株與葉潛仲鄔文伯飲花下
雙桂相傳久百年殊未衰樹聯鋪葉密根老著花遲葩
墜黏詩筆香濃透酒卮月中但孤影安得兩交枝

輓謝疊山詩

三首

湯漢

向老逢危亂投軍復欲東九遷徒有命一戰不成功楚
戶言猶在韓讐事已空風塵長蒼莽身世轉飄蓬

芒屨初就道慷慨不辭難袞袞長江盡蕭蕭易水寒風
霜欺漢節塵土上南冠無復加餐飯旁人掬淚看

懷哉千古事百鍊不為柔漢祖尤封齒殷臣不事周寧
隨文相國直匹李潭州浩蕩江相接東西萬古愁

白鶴觀

鄧林

荒徑行如錯蟠松看轉奇鳥聲人靜處山色雨晴時賒
得溪翁酒閒尋道士碁箇中有佳趣莫怪下山遲

廬山棲賢寺

名重於諸刹前賢舊隱踪無人知有路隔樹忽聞鐘瀑
壯山疑裂雲深樹若封或傳遺豪在三叩昔時松

湓江

遠樹一重重煙村與市通難尋元亮宅遙酌菊花叢蜀
浪帆檣外廬山几席中何時邊事息來此作漁翁

鬱孤臺

黃大受

臺高日欲暝晚眺眼增明疊嶂羅雲樹雙流抱粉城低
浮煙萬棟清送月三更尚約秋吟夜江聲帶雨聽

普通禪寺

釋德惠

古寺何年有巍巍入杳冥水如僧眼碧山作佛頭青瓦

礫皆能說虛空亦解聽道人心已寂窗下捲殘經

江西通志卷一百五十二

欽定四庫全書

江西通志卷一百五十三

藝文

詩七

五言律

元

豫章貢院即事奉和雲林提舉晚春閒居舊韻

吳澄

客裏秋光好歸心不厭遲牆低孤塔見院靜一簾垂隔

紙聞風怒臨堦者日移宛然似三逕未負菊花期

送劉仲誠歸潯陽

程文海

不見匡山久高人得飽者遺民甘入社中允竟辭官南
極光芒逼東風紫翠寒君歸煩訊問五老近平安

饒州道上

二首

何中

新晴破積陰淑氣泛行襟千里山河眼百年耆舊心霞
飛滄海遠煙入綠村深學劍江東者茫茫不可尋

手春初歇杵麥粥午香知白酒村村薄青山處處奇天

垂雙鶴遠江渡一舟遲楓合東吳綠何人續楚辭

白鷺洲

淡淡薰風喜江明天影開竹陰侵水碧草色近人來諸
老心猶在千年首獨回非無李供奉却久鳳凰臺

題祝道士龍虎山先天觀

揭傒斯

聞說先天觀重重絕壁環鳥啼青澗裏花落白雲間樵
子能長嘯居人識大還洞門無處認惟有水潺湲

雪中同程漢翁程志可登盱江從姑山

新年殘雪裏孤石梵王祠拔地驚橫絕嵌空欲倒垂平
田沿上遠寒水望中遲試問南安錫飛來正幾時

北上登小孤山

至大元年

積雨西南下朝宗第一門憂勞思舜禹疏鑿正乾坤地
束千帆側天扶一柱尊蛟龍深窟宅穩睡莫騰翻

南康夜泊聞廬阜鐘聲

廬山三百寺何處叩層雲宿鳥月中起歸人湖上聞入
空應更迥近瀑正難分遙想諸僧定香爐上夕熏

送朱本初法師赴豫章玉隆宮

柳貫

鎖蛟惟有柱墮鼠已無家想到真仙宅能回俗士車露
壇春翦柏雲白夜敲茶人境今雙絕長吟採物華

觀玉隆宮所藏宋乾道宸翰雲壑二字

虞集

昔老雲歸壑天章自九重日華常映鳳山氣盡成龍俯
仰遺陳迹高深儼德容飄然化春雨結想在高松

星子鎮道中

王惲

北下星關道川開百里寬夢殘傾錦恰吟細緩征鞍土
峽深回洞山田疊醺壇一杯亭傳酒來為敵霜寒

遊麻姑萬松庵

貢師泰

積雨變秋思清遊愜道心過橋分履迹問字逐鐘音紅
墮鳥爭果綠深魚占陰何當脫塵鞅重此契幽尋

過隆興章江門

張翥

把酒西風裏挂帆南斗傍夕陽城角盡人影水中長問
俗勞羈旅干時儼俊良平生槎上意漂轉益難忘

過烏山鋪

伯顏子中

溪流霜後淺野燒曉來明古路無人跡空山有驛名衾
寒知夜永柝響覺風生苦被浮名誤栖栖復此行

建昌胡氏小有樓

陳旅

窈窕麻姑宅登臨憶謝公近聞好山色都在小樓中屋
曙丹霞吐城深翠雨通石池正當戶人立藕花風

遊麻姑山

黃鎮成

絕巘寒聲淺陰堂翠色交搨書摩蘇石炊黍拾煙梢瀑

落投龍洞雲歸傍鶴巢未能招我隱何用解人嘲

泊舟老鸛背

江在九

楊 奐

袞袞風生背涓涓月印沙船頭平壓浪櫂尾旋成花老去長為客愁來轉憶家雙棲疎影裏羨殺柳橋鴉

次韻玉瑯雲隱圖

并序

趙 沔

番陽王本善故居懷玉山之北號曰玉瑯雲隱鄉先達進士董公為之記和陽王使君為之賦又得星源韓徵君為之圖余嘗過本善所寓見其淨埽一室琴

書圖畫與弓劍雜前培桂植菊怪石纖蒲幽潔可愛
蓋能審已推分隨所寓而安視竄名尺籍而有所顧
願者不同科也乃次使君韻附於卷末以釋其幽思
云

馬上劍三尺山中雲半間無人尋草迹有虎卧柴關解
甲端睥後懸弓定地還胡為思舊隱畢竟復誰閒

舟次峽江

郭鈺

江上晚晴好臨行復艤舟雨龍歸大秀水鳥度巴丘公

理人中傑子真方外遊時危論出處吾道莽悠悠

題周瑜廟

在峽江

雄姿不可見遺廟俯江干
簫鼓龍祠近旌麾虎落殘
樹勲先葛亮定霸走曹瞞
獨恨三分後無人憶漢官

賦孺子亭

丁復

東漢久無國南州猶有亭
虛楹過日白老樹入湖青
歲晚送僧去天寒行獨經
搔頭雙櫓側余髮故星星

宿蠡口

華幼武

春風吹短擢迤邐望歸程刁斗溪邊戍旌旗野外營市
橋人迹少官路馬蹄輕欲向東湖去邊烽永夜明

石岩

艾申

突兀倚蒼穹誰云巧妙工滴油巖已竭神運廩常空人
入嵌空裏春歸杖履中一翁何處在孤塔凜高風

題信州先天觀圖二首

楊載

高林褰翠氣虛谷散虹光道士多騎虎仙人自牧羊澗
泉通地遠山嶺際天長戴子文為記流傳示不忘

四圍山不斷狀若碧芙蓉谷遠含風細崖深下露濃茂
林藏虎豹陰洞伏蛟龍恍惚神人降浮空羽蓋重

明

大孤山次舉善茂才韻

王沂

聞說揚瀾好春舟更一灣江豚乘水上野鶻落雲間勝
景疑三島靈祠俯萬山若逢王子晉笙鶴定相攀

過臨江訪彭聲之

金鳳洲邊路維舟重憶君江虛秋氣入沙淨曙光分斷

鴈前汀起鳴鐘隔岸聞因過鑑池上詩思亂愁雲

快閣春望次王子啓

劉崧

使者徵兵去居民避地回南風猶鼓角北岸自樓臺白
水晴雲動青山暮雨來百年舊城郭臨眺獨興哀

玉華山

翠巘十峰合丹崖一徑通樓臺上雲氣草木動天風野
曠行人外江平落雁中傷心俯城郭煙雨正冥濛

過彭澤

解縉

青山圍一縣隱隱見人家亂石江邊出孤帆帶日斜翠
添官舍柳香泛驛樓花不見陶彭澤湓城起暮鴉

廬山

扁舟過彭蠡遠遠見匡山巨石危將墮陰雲去復還平
鋪三百里高出九霄間久在風塵際覽觀心自閒

清江晚眺

清江臨望處一一見鄉山玉筍浮雲去金川夕照殘維
舟訪舊隱飛鳥倦初還歸到仁山下漁樵日日閒

經湖口縣

劉永之

古縣開湖口高橋集岸隈
山從廬阜起江向武昌來
近水皆楊柳荒城半草萊
客心元自速更遣曉風催

四月東湖泛舟

王恭

落日東湖裏相攜看綵舟
澄明憐水物浩蕩狎沙鷗
載妓從歌舞飛觴任去留
綠荷深處月流影上滄洲

經鄱陽舟中作

揚帆渡彭蠡雲樹曉冥冥
潮到潯陽白山連建業
青乾

坤隨去鳥江海任流萍回首鄉林遠歸鴻不可聽

過九江

韓守益

夸險休渝節勤勞莫問家暮船維柳樹春水泛桃花廬
阜依霄漢江州對渚沙多情白司馬曾此賦琵琶

龍仙寺

有序

梁蘭

古傳寺鐘與龍鬪田中鐘不能勝穴地而逃止於青
原白鷺之間其穴至今尚存徑三尺許泉水湧出人
言其無底焉寺以此得名

古寺名空在依山只數椽鐘逃猶有穴龍去已成仙古
礎埋春草迴塘落澗泉諸僧離亂後頭髮也垂肩

樵舍

蕭岐

樵舍臨江潯人家水遠堤葦籬通徑小茅屋接簷低稅
重魚難得情深酒自攜維舟風色好留滯夕陽西

鄱湖

魯修

湖水霜前落漁人動作羣洲平沙草在山散夕陽分剝
落番君廟荒涼陶母墳行舟與過雁萬古自紛紛

望武山佑仙觀

周是修

天上神仙府人間道德門
水分千澗遠山拱一州尊
松鶴忘寒暑雷龍警旦昏
何時登絕頂瀟灑望乾坤

金牛坡

胡儼

昔自五丁鑿今看臨白雲
落花紅點點芳草綠紛紛
函谷虛陰勒華陽空彩文
仙家多變化種玉不耕耘

棲霞谷

林壑煙霏斂朝霞五色新
未迎初旦日長有四時春
絳

闕存丹氣黃庭養谷神仙經間甚祕稽首九華真

九華真妃

云餐霞之經甚祕

游從姑山

何文淵

岸闊人家遠天高樹影微
龍藏通海井雁落釣魚磯
石徑蒼苔滑春園紫蕨肥
欲知方外事此處問禪機

遊麻姑山

山連廬阜遠水接玉壺深
顏字碑猶在詩僧墓可尋
桃開千樹錦松落半崖陰
臺殿聞清響仙人奏綺琴

滄洲 二首

王直

贛水緣南趾，文溪繞北涯。
分流通曲渚，匯合漲平沙。
豈但千頭橘，還宜五色瓜。
人生貴自適，老至欲移家。
江艇浮文鷁，溪橋架彩虹。
路通林影外，人度水光中。
椒裏臙脂實，葵分翡翠叢。
得錢即沽酒，沽溉及鄰翁。

東林石筍

蕭儀

雙雙尖石筍，借問是誰栽。
歲久難成竹，春深只長苔。
每疑因地瘠，不見出雲來。
千古東林下，紛紛歷劫灰。

西壩草堂為廬陵宋內翰賦

黎擴

閒說西谿上春風小院開
野蠶成繭盡江燕引雛迴
竹裏園基局荷香沁酒杯
晚涼疎雨過隨意步蒼苔

送人還盱江

新涼生白苧遊子倍淒然
客思秋砧外鄉心旅雁前
西風千里道斜月五更船
亦有還家夢隨君到汝川

南村別墅為饒松坡題

羅倫

吾愛南村好頻過處士家
白雲留客住濁酒隔牆賒
陰

壑藏春雪清溪洗暮霞自今來往慣薇蕨早生芽

登擬峴臺

吳與弼

城據東南勝臺分襄楚名人煙縈近市竹樹離長汀愁
逐登臨散神因眺望清窮通省萬物未易達浮生

夜發蕭灘

徐問

驛小臨官道沙長帶水城山於雲處沒星過渡邊明瑣
瑣非初志營營慨此生北堂凝望遠秋日萬重情

南康道中

王烈

歸路梅關北歸心鰲浦邊路遙頻問驛步澀只思船冬
至將春候南風欲雪天官梅還識我相對笑華顛

落星寺

董時望

廬阜風烟會波光入望幽一拳擎寺出萬里枕江流昔
訝天星落今知地骨浮神京更迢遞不盡思悠悠

彭蠡

徐禎卿

茫茫彭蠡口隱隱鄱陽岑地涌三辰動江連九派深揚
舲武昌客興發豫章吟不見垂綸叟烟波空我心

過小孤山

張適

江行已十日始至小孤山東下方千里西來第一關穿
巖祠廟險躡石鵲鷄閒賴有人成市篙翁得酒還

上十八灘

王思

春雨欲平岸灘灘無急流傳聞常畏險坐看欲消憂豈
意驅馳地仍為汗漫遊鬱孤臺突起疑是望鄉樓

與謝寶慶擬登匡山至九江阻雨和韻

李東陽

瀑布懸青壁香爐出紫林謫仙千古句謝眺一生心野
樹連天暝春江拍岸深我來茲郡晚風雨罷登臨

弋陽雨晴

暑伏秋先至天陰日易低沙痕平草樹雨腳見虹霓席
坐擁書滿船更聽鼓齊葛溪三百里川路隔東西

廣信道中

旅泊逢初雁山城昨夜秋雨深南澗水風急上灘舟取
捷非無地垂堂且自謀江潮迂拙甚吾得及安流

發南昌宿東湖口

落日豫章城歸帆第幾程
草中南浦色樹裏北禽聲
旅宿依津處郵籤報客名
東湖不可度風雨坐天明

安仁道中

夏良勝

暝色依依暮長溪舟自行
草汀迎迴碧桃岸照殘明
散帙忘吾事題囊仗此生
北山如在望春夢更多情

早發新昌

夏寅

又出宜豐路長林過幾家
圓橙秋晚實香稻午時花
細

草眠黃犢清江點黑鴉行吟記吾迹真不異搏沙

遊麻姑山

邵寶

亭依青嶂曲路出綠蘿間泉聽雲中珮峰看霧裏鬟風
煙初曠遠花鳥各幽閑落盡西林日遊人始擬還

次萍鄉

歐陽鐸

明發宣風館秋陰得氣饒雲昏山欲斷泥濘路偏遙近
縣峰頭塔橫江屋底橋舊時銅漏刻強半土中焦

落星寺別蔣南泠

王泰

別意隨流水迴船過落星湖光侵寺碧山色入簾青鷗鷺馴沙岸魚龍駭石汀虛堂歸興渺烟浪晚冥冥

袁州謁韓文公廟

李夢陽

袁州山在城韓廟倚山青冕服前朝貌文章百代名石苔猶馬路春竹自鶯聲立望潮陽近翻翻海氣征

徐墓書張相國碑銘

不讀南州傳誰知高士心江城遺像在春日古祠深竹鳥嚶嚶合松墻靡靡陰曲江千載碣書罷淚盈襟

還贛

王守仁

積雨零都道山途喜乍晴
溪流遂渡馬岡樹隱前旌
野屋多移竈窮苗尚阻兵
迎趨勤父老無補媿巡行

過分宜望鈴岡廟

共傳峯頂樹古廟有靈神
楚俗多尊鬼巫言解惑人
望裡存舊典捍禦及斯民
世事渾如此題詩感慨新

芝山

周用

驅馬登山去其如高興何
竹書聊紀勝芝草已無多
野

樹吹黃葉丹宮蔓碧蘿同遊吾令尹詩石有人磨

仙巖洞和韻

熊相

景入仙巖洞昏鴉壓樹低路從丹井畔僧坐水雲西
草滿無人跡林深有獸蹄孤峯登石笋物物可詩題

東湖

毛伯溫

東湖春渺渺隱士此幽居迴艇愁驚鳥垂竿不釣魚
興來時覓酒得暇或觀書斜照臨波影小窗日對虛

信州皇華亭

王慎中

誰識悠悠意寒流對寂寥閒禽遵水曲過棹入風謹細
雨青山映繁霜赤岸凋門前來往路坐使歲時銷

德安道中書事

百室山中邑觀風見俗淳土膏時雨發田事暮春新鳥
雀鳴爭食雞豚性近人前驅行且緩方此問農民

登葛仙山

二首

夏言

危磴入青冥凭高駐鶴亭四山暗風雨半壑響雷霆龍
起西潭霧山圍北斗星長生有真訣吾欲叩仙靈

昔聞勾漏令今謁左宮仙井憶燒丹處臺留化鶴年路
盤九龍上山轉七星懸誰識塵寰裏烟霞自有天

詠真洞天次龍溪韻

羅洪先

白雲開洞壑一徑入煙蕪應谷鐘聲遠憑虛閣影孤龍
蛇時亦隱瓦礫道非無莫話前朝事今吾豈故吾

栗里

陶令罷官後西疇秫正滋至今栗里上猶見柳條垂山
氣佳如舊居鄰問不知誰能邂逅飲一醉寫心期

龍虎山

心閑無所適高閣日凭欄
虛谷多朝氣深林生暮寒
猶龍嗟見聖煉虎欲成丹
二事吾何有逢人且共餐

分水關

徐階

峻嶺開閩服重關限楚氛
星隨分野異地漸燠涼
分人語聽難辨山名得未聞
所嗟南逝水不似北歸雲

袁州九日

皇甫汈

信美登高日宜春有舊臺
花仍吳地發雁自楚天來
郭

外千家盡牕中萬壑哀此鄉多旨酒聊覆使君盃

龍洲讀書

胡直

窈窕繁花路高虛野甸居漸為逃世客懶答貴人書
水閣依鷗鳥塵編養蠹魚日尋垂釣侶長在月明初

觀山寺

頗識浮生幻幽尋不記踪地同離垢國人在妙高峰
雲起移前嶂窗虛答暮鐘過臨泉穴坐清詠起蟠龍

石蓮後洞轉尋又一小洞

不覺窺明見先從踏暗來忽然闕混沌那復有塵埃高
竇容天入重關付月開未須嫌闌寂作伴翠莓苔

過吳城

羅欽順

舟過吳城驛蒼茫暮景斜古祠淹日月生計半漁茶碧
草眠黃犢青山印白沙風光長似此何處不為家

東湖

吳桂芳

東湖行一曲十里柳煙齊遠嶼浮空碧長雲壓水低岸
香聞杜若沙淨浴鳬鷺更愛維舟處夕陰蓮葉西

龍沙

朱多炆

龍沙駐蹕地皇祖紀南征草昧君臣定壺漿父老迎平
臨章貢水遠視灌嬰城今古雄圖在低徊落照明

飲望湖亭

熊汝達

湖面遙開鏡山腰小構亭望中煙岫出生久晚風生漁
艇歸帆亂邛燈近郭明更憐高會處地主喜逢迎

九日登凌空閣限杜詠

聶豹

自有登臨勝何勞更築臺此山當邑望高閣傍雲開肯

負尋幽興還期載酒來浮生惟有醉莫待菊花催

舒家企望蘇黃臺臺在鳳岡北金錢池東蘇公舊
有謝道士贊秧馬歌二石刻存清都道院

陳嘉謨

蘇黃千載後山水九秋長名姓兒童識煙霞詞賦香金
錢留翠壑鳴鳳在高岡剩有風雲護藤蘿暗自芳

古西臺寺今惠祐廟也以其高平在章江之西故
名南唐吉郡守劉公竺生祠今西臺寺也公守郡

時政暇自郡治登山習靜有二白鹿隨車生祠即
公習靜處公既歿助國福民靈爽大彰郡人名山
曰神岡以不忘公而拓生祠為廟久之聞於朝以
其隘也於是移寺於今地而勅有司廟於高平之
處嘉靖初尚有廟祝周姓者家寺之東廟之西予
售周氏地重建亭堂顏魯公嘗一遊青原山山谷
賦之云事如飛鴻往名與南斗偕矧公賞勝茲山
久矣公固存也

修竹西臺寺前朝太守祠我來尋勝蹟事往見殘碑舊
賞青山在仙蹤白鹿隨空令人代裏懷古有餘思

永和以儒林名鄉以儒戶註籍者三家其地有夫
子廟講經臺皆宋時遺址金錢池以蘇黃名龍窟
一名石窟以文信國降神之地名春日自舒家企
之清都觀道士乾元為予指點遺跡云

選勝白雲隈尋春花裏來杏紅夫子廟草綠講經臺池
水金錢滿山泉龍窟閒廢興人世事千載一徘徊

秋發庾嶺

湯顯祖

楓葉沾秋影涼蟬隱夕暉
梧雲初晝靄花露欲霏微
嶺色隨行棹江光滿客衣
徘徊今夜月孤鵲正南飛

題張洪陽閒雲館

吳應賓

賦就張平子飄然獨草亭
回環一水綠高下萬山青
避世曾金馬焚香對石屏
祇疑雲霧窟長護太元經

前題

劉應秋

心遠喧常靜身閒道自夸
因兼大小隱閒誦去來詞
書

案風開帙花欄雨濯枝浮雲同此意行住本無期

晚霽玉峽驛望玉笥山

區大相

峽束江流窄山欹堞影低玉梁沉宿霧金澗落晴霓水
鳥窺魚下林猿摘果啼靈峰不可到矯首問丹梯

東林寺

昔讀高僧傳兼懷逸士蹤停車虎溪水對面香爐峰舊
殿丹青落荒池蔓草茸我來松下坐日暮但聞鐘

宜春臺眺望

張銓

臺以宜春勝登臨恰仲春竹風如款客花氣欲薰人山
色平依檻江流曲抱城昔賢棲隱處覽古倍含情

紫清觀

在西山葛洪井側

張位

逢泉皆可坐擊石自成吟處處藤蘿好重重紫翠深人
稀鶯囀谷院靜鶴盤林何福生居此桃源莫更尋

宿化城寺

峭磴疑無路靈源別有天暮煙籠合嶂春水漫平田境
僻少塵事山空清客眠外韜含內美此地得真詮

尋樂天草堂

李萬寶

堂中人寂寞堂下草離披
燕雀歸傍舍松杉落故枝
蕭條嗟異代儒雅憶當時
為爾青衫濕誰吟長恨詞

拜東廓先生墓

鄧元錫

再過青山宅高原空有碑
暮雲深宿草斜日下淪漪
嶽瀆精靈在雲林訪業遲
金針千載祕一語豈勝思

天堂寺舊通虎蹲巖而廢
徙數十步巖端揖其前
華蓋羊稠諸山環抱完密
儼然城闕賦此

石室新開寺天堂舊得名世猶傳米穴吾自愛霞城谿
虎雄全伏稠羊臥不驚散花疑下界縹緲玉虛聲

生米觀一名斬蛟臺

陳邦瞻

萬古旌陽宅江天四面開蘿青懸石磴沙白繞雲臺雁
影秋翻月潮聲暮捲雷斗牛瞻劍氣猶似斷蛟來

花塢貞泉

熊廷相

身比銀瓶潔絲繩不肯牽燕雲懷北闕江月冷南天匿
綬為君計沈珠不自憐盟心清徹底汲井共潛然

蘇雲卿祠

袁懋謙

浮雲何澹蕩空水足留連一夜東湖雨春蔬綠可憐鑿
坏辭後載抱甕想前賢寂寞高風遠疎楊斷暮煙

獅山石塘開鑑

李鼎

荒徑草離離紅泉迸石池雲光涵澹蕩竹色媚漣漪野
性輕鷗狎禪心皓月知鏡中趺坐久策杖得歸遲

仙巖

朱維京

龍虎山巖寺蓬萊兜率天向來青玉杖曾叩翠微巔崖

有千年骨梯懸萬仞船夜聞天樂動縹緲五雲邊

青原山

小徑通初地城南五里湄一泓清似玉亂石錯為山待
月人何在栖霞客未還惟餘春夢闊來往水雲間

游龍光寺

胡大成

香宇依空結虛軒傍水開沙明鴻影度逕靜竹風來午
磬傳清楚晴花點綠苔寥寥人境外宴坐送餘杯

三宿巖呈黃先輩

楊廷麟

江上何年宅乖龍未得眠
梳檣茅屋外鐘鼓雀巢邊
生事依潮汐心兵畏鼠鳶
蕭蕭杖屨意抱膝歎虞絃

弋陽城樓示黃崑來

憶昔同游處相逢共白頭
莎城鴻雁夜蓼水草蟲
秋只此成盤谷何當汎
柏舟殷勤下山去流涕話神州

游鷺湖山下謁四先生祠
胡子徒步追余及此坐
楹間愜歎久之

空谷牛羊下頽楹
魍魎來秋風吹不息
蕪徑埽能開禮

樂關衾枕乾坤出草萊
吾徒幸自最寒樹此徘徊

青塘口有感

擾虎宜愚石驅烏信弱弓
生涯蓬葆外行道苦匏中山
倦鳴鳩雨春悲華黍風所嗟
鷓鴣後猶有輟耕翁

良安峽

揭重熙

壁立雙崔嵬巨靈何日開
氣為王國壯水向帝城來
舟人似無罅濤生欲噴雷
瞿塘徒擁蜀高詠少陵才

暮過香城寺

徐煥

隣僧遙引路，嶺度百盤蒼。
高處見溟海，空中聞妙香。
暮雲孤剎冷，秋草古壇荒。
十里披蓐入下山，無夕陽。

鄱陽湖

楊惟休

片席攬澄湖，青天望眼孤。
中流失南楚，大地坼西吳。
水戰龍飛去，山空鶴返無。
浩歌舷自擊，春色滿平蕪。

送無我上人還廬山

萬元吉

萬里秋聲急，青楓古渡平。
潯陽潮自落，楚岸月孤明。
破衲飢寒去，芒鞋雨雪行。
爐峯遙在望，慧遠定相迎。

經彭澤

吳甘來

亦有東籬菊何人尚隱居夕陽催進艇殘夜擬焚魚物
變者多異名高謗未除懷歸無長物惟有一牀書

碁坪石

傅占衡

天然十九道落子古松間莫問何年石堪銷竟日閑分
持高讓國應却靜省山忽入長生術洪崖妙可攀

移居詩

三首有引

陳上善

徐孺宅前湖水東洪州勝槩也蘇雲卿蔬圃在焉迤

而北為徐巨源榆墩蕭疎曠遠皆有山林之致予嘗
於兩地僦居崇禎乙亥舒子初民招居湖上樓去榆
墩不數十武凭欄舒眺故居景物了了於前然則予
雖移居實未去榆墩蔬圃間也即事呈社中諸子

愛卜此中宅雲泉趣不窮窗山晴泛碧波日溼屯紅門
避高軒過牆容濁酒通種蔬兼織屨生事念蘇公

一水環三面波光弄埜天行人過樹裏釣艇落窗前坐
愛煙霞晚能娛草木年登樓何必賦吾覺酒盃賢

榆墩曾我住，遙對景逾新。
林氣兼雲亂，書聲隔水真。
殘花窺宿客，落日見漁人。
誰信重城裏，居然事隱淪。

宿彭澤

沈起

帆影收南岸，江聲斷不流。
秋高彭蠡澤，雁下荻蘆洲。
一水天無際，千山月上頭。
墟煙人語雜，鄉思倍悠悠。

秋住湖口

吳本泰

雨夜官城暗，霜期候雁呼。
瘦筇黃葉寺，高枕白雲湖。
歲月傷羈客，煙波狎釣徒。
醉吟楓落句，秋思滿東吳。

宿馬祖巖

真人

張宇初

鑿石開蘭若，栖禪結上方。
然燈聞佛磬，聽雨宿僧房。
古樹巖雲合，幽花澗瀨長。
素耽坡谷輩，了悟幻中忙。

送朗癯入匡山

釋讀徹

獨向匡廬去，安禪第幾重。
九江黃葉寺，五老白雲峰。
落日眠蒼兕，飛泉挂玉龍。
憑將歲寒意，先報虎溪松。

國朝

得廬山願雲師書

吳偉業

絕頂誅茅處蒼崖怪瀑風書來飛鳥上僧出亂流中世
事千峯斷鄉心半偈空却將兄弟夢烟雨問江東

東湖因是庵

黃雲師

白野閒依堞蕭齋坐碧叢柳將秋氣瘦人過板橋空佛
火連虛幌漁梁落晚虹徘徊宜小隱幽興與誰同

逆塘寺

暑氣回城廓輕衫集逆塘人宜幽嶼立風漏早禾香樹
影迷清漢蟬聲赴夕陽半龕供佛火五月亦生涼

得文信國羅文毅鄒忠介三先生眞跡喜

成一律

李元鼎

偶集先賢跡淋漓發古香慨然思異代况乃盡同鄉字
挾風霜氣人爭日月光茲遊殊不負世世付珍藏

泊湖口欲上石鍾山未果

舒忠讜

湖心纔月上燈裏是人家水國魚成戶山城樹滿衙魚
龍真有氣雞犬亦侵霞此夜初聞鶡探竒興未賒

小隱巖

黎士弘

出郭無多路茲山遂覺深四時全雨色長夏逼秋心野饌分僧供殘碑與客尋誰能容小隱弭節愧登臨

茶山寺羽泉昔陸鴻漸嘗居此號東岡子寺泉因得名宋時曾文清幾呂文清本中皆嘗居此

馬道畊

不識茶山寺因詢陸羽泉複岡如半垧小屋僅三椽苔澀碑難捫僧閒手為煎未能供七椀自覺腹便便

建昌城

彭孫貽

白水橫官道青山繞廢城餘民百戰盡落日一江明露
下秋菰斷營空野鶴鳴僕夫已憔悴前路自相驚

自豫章上虔南

南上千盤路東風半月程浮雲鄒子驛殘日灌嬰城江
色連吳楚溪陰變晦明兵戈漫回首總是故園情

儲潭廟

程可則

古廟依孤嶼靈潭控上游雲霞藏洞壑歲月老松楸四
壁蛟龍氣中天鳥雀愁翁河今有頌不必戒沈牛

九奇峰訪老僧匡雲

曾傳燦

一折復一折乃知山路長
崖隨藤作杖門以石為梁
遠壑故多色野花殊亂香
老僧惟好睡不問客何方

雲都峽口

雲湧波流黑江風獨戰秋
沙頭鳴亂石峽口出漁舟
盜賊多編戶鄉關亦旅愁
中宵長不寐獨立向寒洲

馬當有懷湖南親友

曾畹

早魃驅雷港奔濤激馬當
江喧秋氣早水宿火雲長
島

嶼吹零雨魚龍混夕陽萬山迎棹入憶遠不歸鄉

康山

甘京

羣雄爭一戰天與定乾坤帝業人何在忠臣廟尚存
篆煙勤伏臘碧浪湧朝昏獨有槐根古當年沐聖恩

晚過東林

王庭

石路斜陽歇寒陰落磻松前峯微見雪近寺漸聞鐘
禮塔尋僧影迴溪問虎蹤茅檐栖鳥處燈火夜朦朧

青陽洞

魏世傑

金精十二境紀載見青陽疑有林泉色相違日光龍
湫低峽石虎跡印荒塘獨樹留門外徒憐桂子香

舟泊彭澤縣有懷陶靖節先生

朱國漢

孤雲天際捲片棹落帆斜鳥下日將夕湖平浪不花縣
名仍典午山色又元嘉為弔陶徵士村酤帶月賒

青雲峯

李來泰

拄笏看朝爽南山第一峯三眠荒堞柳五鬣廢臺松古
燒煙猶滴遙原影自重相看殊未厭空翠正春容

登芝山

史彪古

躡屐陟崔嵬幽尋亦快哉千櫺雲外出雙塔望中來磬
罷僧歸定嵐橫鳥數回行行仙路近洞古為誰開

青原山寺依韻

施閏章

衝泥勤杖履隨意得芳菲深院藏花靜高僧乞食稀谷
雲寒不動沙燕雨還飛欲學逃禪去風塵願恐違

晚集來鳳亭分韻

綠渚繫蘭橈紅亭覆柳條落花芳徑積歸翼數峯遙隔

岸招禪客看雲狎野樵回舟月皎皎何處夜吹簫

蕭氏春浮園

地古留雲住林深著處迷拂苔尋舊碣捫葛到丹梯疎磬夕陽外平田春水西黃鶯解留客盡日傍人啼

石亭寺

唐韋升帥江西與寺僧靈徹善徹報詩云相逢盡道休官去林下何曾見一人即此

地

徹公飛錫地繫艇數經過歲久石亭廢秋深江水波香臺馴鳥雀清磬靜竈竈誰使高僧誚歸心此夜多

攸鎮雨泊

王貽上

竟日孤蓬雨宵分尚未休
瘴雲來嶺表江漲下虔州
暗溼桃花重平添竹箭流
更聞禽喚語催白五更頭

同丁鴈水登八境臺

二首

天末欣相見登臨復此臺
飛樓切雲上危堞枕江開
章貢雙流合雲峯四面來
凌風思玉局故國近蓬萊

尚憶圍城日熊羆此枕戈
劫灰孤閣在戰地國殤多
東越鏃王郅南荒服尉佗祇
今烽火息吾輩許高歌

鄒能弘還廬陵寄訊韞退

聞道廬陵縣雙流直到門江山紛近郭笋橘散沙村風
土詩應美艱危道更尊螺川歸棹遠愁思與誰論

東林寺

二首

徐元文

松門隱高寺仙梵近廬峯澗外探龍窟溪邊躡虎蹤經
臺碧樹合石磴白雲封縱履尋僧去遙聞幾處鐘
影殿松杉際齋田菡萏時到來塵鞅息坐久客衣滋陶
令當年蹟顏公絕代碑蒼茫羣象外常得護雲楣

鉛山

朱彝尊

不遠江城路舟師指點遲穴山巢鵲鵲編竹坐鸕鷀晚
飯惟三板朝醒藉一瓶鶯湖酬和地百世起人思

貴溪

亭榭均干越封圻析上饒連山齊覆釜獨石忽成橋想
見黃梅發何曾碧樹彫降丘誰宅此雞犬已寥寥

瑞洪

餘干江路永回首失蘄岳市酒難為醉罾魚乍解饒

自玉

山至安仁捕魚多用烏鬼
魚皆無味至此始用罾

湖寬舟愈小峰遠日初銜漸

識宮亭近分風及布帆

封谿聶侯廟

返照封谿上停橈思惆然地傳白鹿渚人記赤烏年簫
鼓迎神曲帆檣送客船誰令戎馬日萬里入南天

信州道中

易學實

鷺湖峯上雪寒照一村洲十日彤雲墮中宵滿月流林
先生鵲脯野火亂漁舟自是溪山好何當佳客遊

自豐城抵萬安江水大漲

二首

陸 棻

春江灌潦水百堵沒滄洲
釜已遊魚鼈涯難辨馬牛
櫓聲來木杪帆影度城樓
雙劍沈何處青宵起暮愁

欲尋文相墓誰上越王臺
樹擁層嵐雨波鳴大壑
雷迴帆江水斷轉柁峽雲開
獨向斜陽立牢愁破酒杯

登小孤山次梁相國壁間原韻

熊一瀟

突兀疑填石荒唐紀斷鼇
誰移華頂峭偏障海門高
吳楚千帆月江湖五夜濤
滔滔往來去一葉穩漁舸

澹臺墓

萬任

高賢何馬鬣古或葬衣冠壁自沈江去蛟猶畏劍寒千秋城幾戰七尺土仍完是處麒麟塚誰能此並看

贛州

葉燮

設險資形勝雄關扼百蠻倦遊人欲住行役路方艱事去江山舊時平樓櫓閒文成勲業地樽俎尚堪攀

遊歸宗寺

李振裕

今日識歸宗雲煙幾萬重山留千古色門盡六朝松瀑

滅晴來雪經翻定後鐘墨池遺韻在龍象若為容

梅溪洞

龍科寶

奇峰拔地起動步變青蒼十里空人境三門敞石堂深
遊明晝火暑臥冷秋霜道骨予何有殘棋引興長

曾波閣

吳綺

仙院無凡吹秋聲在薜蘿江雲催曙早山雨送涼多一
帙能銷暇三卮足養和主人偏重客皂蓋已頻過

行部至大庾

丁煒

五嶺襟喉地，荒城踞水濱。
市虛經戰伐，土瘠廢耕耘。
雨暗了山樹，天低橫浦雲。
黍苗今漸熟，碩鼠漫成群。

過北蘭寺

二首

宋 肇

霽景開南浦，秋郊訪北蘭。
沙堤延野色，竹隴瞰江湍。
妙相拈花示，禪心即境安。
平生端有異，興發是林巒。

別圃從容過，迴岡更有亭。
沙痕浮日白，山色印江青。
列岫承餘韻，是地舊有支頤感客星。
無須催小隊，漁唱暮

堪聽

春日遊翠巖寺

地自蕭梁闕千年幾廢興
斷幢隨洞失傑閣入雲登
樹簇喧黃鳥簷虛挂紫藤
晨昏孤磬裏羨殺白頭僧

霧過鄱陽湖

王原

水落湖生汎舟行利往還圓
沙分雁渚矮屋占魚灣
身世浮沈際風煙蒼莽間
旅懷頻托興詩筆滿江關
自合鄱嶺下東行至蚱蜢嶺
望漢陽峯

查慎行

已就匡南道紆迴下嶺行路尋松鼠跡山占草蟲名曉

霧沾衣重秋風信杖輕翠屏圍合處遙指仰天坪

在大漢陽

上峯

白近薇中丞招遊廬山信宿秀峯寺得詩四章

開府香山後匡廬洵有緣官雖膺節鉞性自愛雲泉騶
騎行長減齋壇禮必虔每逢三月節來此祝堯年

御扁名新換山門向不移法雲開麗刹佛日獻晨曦賓

客蓮花幕郎君瓊樹枝不嫌衰賤跡兼與野人期

舊識金繩路重叅玉版禪却從扶杖日數到入山年

壬申

八月余遊開先心壁禪師亦於是歲來主法席

白社名相亞靈山會儼然所慚

根器鈍得道讓兄先

漱玉亭仍在飛流落碧空風雲聲忽合山澤氣常通
法乳流相續僧庖給不窮問龍還乞水洗眼記詩翁

登軍山

趙與鴻

山作天南鎮芙蓉矗翠屏層巒圍碧落孤嶂劃青冥
棋古留仙著碑殘勒漢銘晚風吹石竇浣手欲捫星

九日遊小平山

嚴開禧

小平秋色淡登眺興還賒松動風中籟僧斟石上茶人間饒菊酒此地足煙霞莫道歸來晚前村日未斜

泊儲潭廟

顧嗣立

儲山轉蒼翠儲水一泓清茶戶煙中語秧田雨後耕雙江明夕照孤塔倚春城宴坐且為樂風灘浪已平

金斗山

李杜

拾級層峰上鄉城一望分泉添秋過雨巖宿夜歸雲煙

火冥濛辨溪聲隱約聞飄然人境外不復染塵氛

登香山閣贈無學上人

熊履廷

竹密藏高閣攜筇勝可攀好風黃葉路清磬白雲關水
故當軒落山如列檻環忘機沙上鳥日共老僧閒

遊南安東山寺

姚士黌

出郭恣登眺新晴萬象開衆山環寺古一水抱城來老
樹欹沙岸輕煙護碧苔數椽茅屋小亦覺遠塵埃

贛州登八境臺

二首

高孝本

虔州形勝地城出白雲中水急雙江合山高百越通帆
檣多北客魁結競南風新建經營後於今虎穴空

石樓帆乍到先讀大蘇詩江上憑危堞臺前拂斷碑滿
城春樹暗疊嶂曉猿悲八境分明在遊人盡不知

鷹潭

劉命清

不畏前溪冷雞鳴逐曉星風霜欺短鬢身世信浮萍鷹
眼寒潭碧龜紋石敲青無勞嗟遠役百里見鄉亭

龍津

徐亭

進艇得清曠迴灘分曲斜深潭龍子窟墮岸野人家勢
欲驚風雨潛難奮爪牙茫茫問津客猶自困泥沙

登庾公樓

胡慶豫

地是潯陽險樓傳嘯月高疏窗倚官閣飛宇瞰城濠雨
急迷青嶂風狂捲素濤我來三月半春色滿江皋

峽江維舟登眺感興

江上有
龍母廟

梁 機

繫纜洪流急登高晚色侵斜陽山兩岸遠水樹重陰廟
鼓江鴉集風燈戍漏深滔滔東去浪流恨滿歸心

次宋中丞秋日遊北蘭寺韻

二首

蔡秉公

昔日秋屏地相傳即北蘭林幽偏近郭沙聳直驚湍岫

向雙亭列

寺旁有列岫亭

禪從一舫安

僧室題曰做舫居

盡收江外景

滿壁寫煙巒

雲壑逶迤入方橋度雁堂世情塵外遠客況淡中長踏

閣驚秋老看山得句蒼坐深羣籟寂花雨欲生涼

僧坦然創舟室於鍾山顏曰雲槎為題短句

魯之裕


僊槎浮石窟
恰待客星臨
一枕九江月
孤舟萬里心
鶴歸花雨亂
龍臥白雲深
不費君平算
留詩泐小岑

憩雲庵

即蘇雲卿
灌園處

釋元璟

蘇公灌園處
今作梵王宮
門漱東湖水
畦栽秋末菰
白鷗翔檻外
清磬出花中
愛我同門友
棲禪有古風



江西通志卷一百五十三